

河防一覽卷之五

河臣潘季馴輯 聖事王元命校訂 副使曹時聘校訂 運同陳良言編次

河源考

夏書禹貢

導河積石至于龍門南至于華陰東至于底柱  
又東至于孟津東過洛汭至于大伾北過洛水  
至于大陸又北播為九河同為逆河入于海  
蔡傳曰河自積石三千里而後至龍門經但  
一書積石不言方向荒遠在所畧也龍門而

卷五

下因其所經記其自北而南則曰南至華陰  
記其自南而東則曰東至底柱又詳記其東  
向所經之地則曰孟津曰洛汭曰大伾又記  
其自東而北則曰北過洛水又詳記其北向  
所經之地則曰大陸曰九河又記其入海之  
處則曰逆河自洛汭而上河行于山其地皆  
可考自大伾而下垠岸高于平地故決齧流  
移水陸變遷而洛水大陸九河逆河皆難指  
實然上求大伾下得碣石因其方向辨其故



迹則猶可考也

西漢書西域志

西域中央有河其河有兩源一出葱嶺山下一出于闐于闐在南山下其河北流與葱嶺河合東注蒲昌海蒲昌海一名鹽澤者也去玉門陽關三百餘里廣袤三百里其水停居冬夏不增減皆以爲潛行地下南出於積石爲中國河云

山海經

崑崙山縱橫萬里高萬一千里去嵩山五萬里

卷五

二

有清河白河赤河黑河環其墟其白水出其東北陬屈向東南流爲中國河河百里一小曲千里一大曲發源及中國大率常然東流潛行地下至規期山北流分爲兩源一出葱嶺一出于闐其河復合東注蒲昌海復潛行地下南出積石山西南流又東迴入塞過燉煌酒泉張掖郡南與洮河合過安定北地郡地流過朔方郡西又南流過五原郡南又東流過雲中西河郡東又南流過上都河東郡西而出龍門汾水從東

於北入河東即龍門所在龍門未開河出孟門  
東大溢是謂洪水禹鑿龍門始南流至華陰潼  
關與渭水合又東迴砥柱砥柱山名河水分流  
包山而過山見水中若柱然今陝州東河北陝  
縣三縣界及洛陽孟津所在至鞏縣與洛水合  
成臯與濟水合濟水出河北至王屋山而南截  
河渡正對成臯又東北流過武德與沁水合至  
黎陽信都信都今冀州絳水所在絳水亦曰瀆  
水一曰漳水鉅鹿之北遂分爲九河鉅鹿今邢

州大陸所在大陸澤名九河一曰徒駭二太史  
三馬頰四覆釜五湖蘇六簡七絜八鉤盤九鬲  
津又合爲一河而入海齊桓公塞九河以廣田  
居故館陶具邱廣川信都東光河間以東城池  
九河舊跡猶存漢代河決金隄南北多罹其害  
議者常欲求九河故迹而穿之未知其所是以  
班固云自茲距漢已亡其八枝河之故瀆自沙  
邱堰南分也出焉故尚書稱導河積石至于龍  
門今絳州龍門縣界南至華陰北至于砥柱

東至于孟津在洛北都道所奏古今以為津東  
過洛汭至于大伾洛汭今鞏縣在河洛合流之  
所也大伾山今汜水縣即故成臯也山再成曰  
伾北過水至於大陸其絳水今冀州信都大陸  
澤名今邢州鉅鹿又北播為九河同為逆河入  
海是也同合出九河又合為一名為逆河逆行  
也言海口有潮汐潮以迎河水

### 元史河源記

河源古無所見禹貢導河止自積石漢使張騫

卷五

四

持節道西域度玉門見二水交流發葱嶺趨于  
闐匯鹽澤伏流千里至積石而再出唐薛元鼎  
使吐蕃訪河源得之於悶磨黎山然皆歷歲月  
涉艱難而其所得不過如此世之論河源者又  
皆推本二家其說恠誕總其實皆非本真意者  
漢唐之時外未盡臣服而道未盡通故其所  
往不無迂迴艱阻不能直抵其處而究其極也  
元有天下薄海內外人迹所及皆置驛傳使驛  
徃來如行國中至元十七年命都實為招討使

佩金虎符徃求河源都實既受命是歲至河州  
州之東六十里有寧河驛驛西南六十里有山  
曰殺馬關林麓窮隘舉足浸高行一日至巔西  
去愈高四閱月始抵河源是冬還報并圖其城  
傳位置以聞其後翰林學士潘昂霄從都實之  
弟闡闡出得其說撰為河源志臨川朱思本又  
從八里吉思家得帝師所藏梵字圖書而以華  
文譯之與昂霄所志互有詳畧今取二家之書  
考定其說有不同者附注于下按河源在吐蕃

朶甘思西鄙有泉百餘泓沮洳渙散弗可逼視  
方可七八十里履高山下瞰燦若列星以故名  
火敦腦兒火敦譯言星宿也思本曰河源在中  
州西南直四川馬湖蠻部之正西三千餘里  
雲南麗江宜撫司之西北一千五百餘里帝  
師撒思加地之西南二千餘里水從地涌出  
入井其井百餘東北流百餘里匯為大澤曰  
火敦腦兒郡流奔轉近五七里匯二巨澤名  
阿刺腦兒自西而東連屬吞噬行一日迤邐東

鶩成川號赤賓河又二三日水西南來名亦里  
出與赤賓河合又三四日水來南名忽闌又水  
東南來名也里木合流入赤賓其流浸六始名  
黃河然水猶清人可涉思本曰忽闌河源出自  
南山其地大山峻嶺綿亘千里水流五百餘  
里注也里出河也里出河源亦出自南山西  
北流五百餘里始與黃河合又一二日岐爲  
八九股名也孫幹倫譯言九渡通廣五七里可  
度馬又四五日水渾濁土人抱革囊騎過之聚

落糾木幹象舟傳髦革以濟僅容兩人自是兩  
山峽束廣可一里二里或半里其深叵測朶甘  
思東北有大雪山名亦耳麻不莫刺其山最高  
譯言騰乞里塔即崑崙也山腹至頂皆雪冬夏  
不消土人言遠年成冰時六月見之自八九股  
水至崑崙行二十日思本曰自潭水東北流二  
百餘里與懷里火禿河合懷里火禿河源自  
南山西北偏西流八百餘里與黃河合又東  
北流一百餘里過即麻哈地又正北流 自

餘里乃折而西北流二百餘里又折西正印  
流一百餘里又折西而東流之崑崙山下峯  
名亦耳麻不刺其山高峻非常山麓綿亘五  
百餘里河隨山足東流過撒思家即闊闊提  
地河行崑崙南半日又四五日至地名而闊  
及闊提二地相屬又三日地名哈刺別里赤兒  
四達之衝也多寇盜有官兵鎮之近北二日河  
水過之思本曰河過闊提與亦西八思今河峇  
亦西八思今河源自鐵豹嶺之北正北流凡

五百餘里而與黃河合崑崙以西人簡少多  
處山南山皆不穹峻水益散漫獸有髦牛野馬  
狼狽羴羊之類其東山益高地亦漸下岸狹隘  
有狐可一躍而越之處行五六日有水西南來  
名納隣哈刺譯言細黃河也思本曰哈刺河自  
白狗嶺之北水西北流五百餘里與黃河合  
又兩日水南來名乞兒馬出二水合流入河思  
本曰自哈刺河與黃河合正北流二百餘里  
過阿以伯站折而西北流經崑崙之北二百

餘里與乞里馬出河合乞里馬出河源自威  
茂州之西北岷山之北水北流即古當州境  
正北流四百餘里折而西北流又五百餘里  
與黃河合河水北行轉西流過崑崙北一向  
東北流約行半月至貴德州地名必赤里始有  
州治官府州隸吐蕃等處宣慰司司治河州又  
四五日至積石州即禹貢積石五日至河州安  
鄉關一日至打羅坑東北行一日洮河水南來  
入河思本曰自乞里馬出河與黃河合又西北

流與鵬梭河合鵬梭河源自鵬梭山之西北  
水正西流七百餘里過禮塞塔失地與黃河  
合折而西北流三百餘里又折而東北流過  
西寧州貴德州馬嶺凡八百餘里與邈水合  
邈水源自青唐宿軍谷正東流五百餘里過  
三巴站與黃河合又東北流過土橋站古積  
石州來羗城廓州構米站界都城凡五百餘  
里過河州與野龐河合野龐河源自西傾山  
之北水東北流凡五百餘里與黃河合又東



北流一百餘里過站白城銀川站與湟水合  
鹽河合湟水迺自祁連山下正東流一千餘  
里注沿壘河沿壘河源自剛丹州之南剛丹  
山下水東南流七百餘里注湟水然後與黃  
河合又東北流一百餘里與洮河合洮河源  
自羊撒嶺北東北流過臨洮府凡八百餘里  
與黃河合又一日至蘭州過北卜渡至鳴沙  
河過應吉里州正東行至寧夏府南東行即東  
勝州隸大同路自發源至漢地南北澗溪細流

旁貫莫知紀極山皆草石至積石方林木暢茂  
世言河九折彼地有二折蓋乞兒馬出及貴德  
必赤里也思本曰自洮水與河合北流過達地  
凡八百餘里過豐州西受降城折而正東流  
過達達地古天德軍中受降城東受降城凡  
七百餘里折而正南流過大同路雲內州東  
勝州與黑河合黑河源自漁陽嶺之南水正  
西流凡五百餘里與黃河合又正南流過保  
德州葭州及興州境又過臨州凡一千餘里

與吃那河合吃那河源自古寧州東南流過  
陝西省綏德州凡七百餘里與黃河合又  
流三百餘里與延安河合延安河源自陝西  
蘆子關亂山中南流三百餘里過延安府折  
而正東流三百里與黃河合又南流三百里  
與汾河合汾河源自河東朔武州之南亂山  
中西南流過管州冀寧路汾州霍州晉寧路  
絳州又西流至龍門凡一千二百餘里始與  
黃河合又南流二百里過河中府過潼關與  
太華太山綿亘水勢不可復南乃折而東流  
大槩河源東北流所歷皆西蕃地至蘭州凡  
四千五百餘里始入中國又東北流過達達  
地凡二千五百餘里始入河東境內又南流  
至河中一千八百餘里通計九千餘里

興亞院華北連絡部

歷代河決考

周定王五年河徙碎礫

晉景公十五年穀梁傳曰梁山崩壅河三日不流晉君召伯尊伯尊遇輦者問焉輦者曰君親素編帥羣臣哭之既而祠焉斯流矣伯尊至左傳曰問之伯尊如其言而河流伯宗

漢

文帝十二年冬十二月河決酸棗東潰金隄

武帝建元三年河水溢于平原

卷五

元光三年春河水徙從頓丘東南流夏復決濮

陽瓠子注鉅野通淮泗汎郡十六

元帝永光五年冬十二月河決初武帝既塞宣房

後河復北決於館陶分為屯氏河東北入海

廣深與大河等故因其自然不堤塞也是歲

河決清河靈鳴犢口而屯氏河絕

成帝建始四年夏四月河決東郡金隄灌四郡三

十二縣居地十五萬頃壞宮亭廬舍且四萬

所

河平三年秋八月河復決平原流入濟南千乘  
所壞敗者半建始時復遣王延世作治六月  
乃成

鴻嘉四年秋渤海清河信都河水溢灌縣邑  
三十一敗官亭民舍四萬餘所

新莽三年河決魏郡泛清河以東數郡先是莽  
恐河決為元城塚墓害及決東去元城不憂  
水故遂不隄塞

唐

卷五

十三

二百一

玄宗開元十年博州河決十四年魏州河溢十五  
年冀州河溢

肅宗乾寧三年夏四月河漲將毀滑州朱全忠決  
為二河夾城而東為害滋甚

後唐

同光二年秋七月唐發兵塞決河先是梁攻楊  
劉決河水以限晉兵梁所決河連年為曹濮  
患命將軍婁繼英督汴滑兵塞之未幾復壞

晉

天福二年河決鄆州四年河決博州六年河決滑州

開運三年秋七月河決楊劉西入莘縣廣四十里自朝城北流

漢

乾祐元年五月河決魚池三年六月河決鄭州

周

廣順二年十二月河決鄭州滑州周遣使脩塞周主以決河爲憂王浚請自行視許之周塞

卷五

十三

二百十四

決河三月澶州言

天福十一年黃河自觀城縣界楚里村隄決東北經臨黃觀城兩縣

宋

太祖乾德二年赤河決東平之竹村三年秋大雨開封府河決陽武又孟州水漲壞中澗橋梁澶鄆亦言河決

四年八月滑州河決壞靈河縣大隄開寶四年十一月河決澶淵泛數州

太宗太平興國二年秋七月河決孟州之溫縣鄭  
州之滎澤澶州之頓邱

七年河大漲感清河凌鄆州城將陷塞其門急  
奏以聞詔殿前承旨劉吉馳往固之

八年五月河大決滑州韓村泛澶濮曹濟東南  
流至彭城界入于淮

九年春滑州復言房村河決

淳化四年十月河決澶州陷北城壞廬舍七千  
餘區

真宗咸平三年五月河決鄆州王陵埽浮鉅野入  
淮泗水勢悍激浸迫州城

景德元年九月澶州言河決橫隴埽

四年又壞王公埽並許詔發兵夫完治之

大中祥符三年十月判河中府陳堯叟言白浮

圖村河水決溢明年九月棣州河決聶家口

五年正月本州請徙城居民重遷命使完憲既

成又決于州東南李氏灣環城數十里民舍

多壞又請徙商河役興踰年雖扞護完築堦

免決溢而湍流益暴壅地益削河勢高民屋  
殆踰丈矣民苦久役而終憂水患

六年乃詔徙州于陽信之八方寺

七年八月河決澶州大吳埽

天禧三年六月乙未夜滑州河溢城西北天臺  
山旁俄復潰于城西南岸漫溢州城歷澶濮  
曹鄆注梁山泊又合清水古汴渠東入于淮  
州邑罹患者三十二

仁宗天聖六年六月河決澶州之王楚埽

卷五

十五

二百六十一

明道二年徙大名之朝城縣于社婆村廢鄆州  
之王橋渡淄州之臨河鎮以避水

景祐元年七月河決澶州橫壠埽

慶曆八年六月癸酉河決商胡埽

皇祐元年三月河合永濟渠注乾寧軍

二年七月辛酉河復決大名府館陶縣之鄆州  
四年正月乙亥塞鄆固而河勢猶壅議者請開  
六塔以披其勢

嘉祐元年夏四月壬子朔塞商胡北流入六塔

河不能容是夕復決令三司鑿鉄判官沈立  
往行視

神宗熙寧元年六月河溢恩州烏欄堤又決冀州  
棗強埽北注瀛七月又溢瀛州樂善埽

四年七月辛卯北京新堤第四第五埽決漂溺  
館陶永濟清陽以北八月河溢澶州曹村十  
月溢衛州王供時新堤凡六埽而決者二下  
屬恩冀貫御河奔衝爲一

十年五月滎澤河決急詔判都水監俞光往治

卷五

十六

之是歲七月河復溢衛州王供及汲縣上下  
埽懷州黃沁滑州韓村乙丑遂大決于澶州  
曹村澶淵北流斷絕河道南徙東匯于梁山  
張澤灤分爲二派一合南清河入于淮一合  
北清河入于海

卬濬大學衍義補曰此黃河入淮之始

本年八月又鄭州滎澤

元豐元年四月寅寅決口塞詔改曹村埽曰靈  
平五月甲戌新堤成閉口斷流河復歸北



三年七月澶州孫村陳埽及大吳小吳埽決  
四年四月小吳埽復大決自澶注入御河  
五年六月河溢北京內黃埽七月決大吳埽堤  
以紆靈平下埽危急八月河決鄭州原武埽  
溢入利津陽武溝刁馬河歸納梁山灤  
七年七月河溢元城埽決橫堤破  
八年河流雖北而孫村低下夏秋霖雨漲水往  
往東出小吳之決十月又決大名之小張口  
元符三年四月河決蘇村

徽宗大觀元年丙申邢州言河決陷鉅鹿縣康寅  
冀州河溢壞信都南宮兩縣

三年六月河溢冀州信都十一月河決清河埽  
是歲水壞天成聖功橋

元

世祖至元九年七月衛輝路新鄉縣廣盈倉南河  
北岸決

二十三年河決衝突河南郡縣凡十五處役民  
二十餘萬塞之

二十五年汴梁路陽武縣諸處河決二十二所  
漂蕩麥禾房舍委宣慰司督本路差夫修治  
成宗大德元年秋七月河決杞縣蒲口塞之明年  
蒲口復決塞河之役無歲無之是後水北入  
復河故道

二年秋七月大雨河決漂歸德屬縣田廬禾稼  
三年五月河南省言河決蒲口兒等處侵歸德  
府數郡百姓被災

武宗至大二年秋七月河決歸德又決封丘

卷五

六

仁宗延祐七年七月汴城路言滎澤縣六月十一  
日河決塔海莊東隄橫隄兩重又決數處二  
十三日夜開封縣蘇村及七里寺復決二處  
泰定帝泰定二年五月河溢汴梁三年河決陽武  
漂民居萬六千五百餘家尋復壞汴梁樂利  
隄發丁夫六萬四千人築之

文宗至順元年六月曹州濟陰縣河防官言初五  
日魏家道口黃河舊堤將決不可修築募民  
修護水月隄復於近北築月堤未竟至二十

一日水忽泛溢新舊三堤一時咸決明日外  
堤復壞有蛇時出沒於中所下樁土一掃無  
遺

順帝至正四年五月大雨二十餘日黃河暴溢平  
地水深二丈許北決白茅堤六月又北決金  
隄並河郡邑濟寧軍州虞城碭山金鄉魚臺  
豐沛定陶楚丘武城以至曹州東明鉅野鄆  
城嘉祥汶上任城等處皆罹水患北侵安山  
沿入會通運河延袤濟南河間將壞西漕司

鹽場

五年河決濟陰漂官民廬舍殆盡

六年河決

二十六年春二月黃河北徙先是河決小疏口  
達於清河壞民居傷禾稼至是復北徙自東  
明曹濮下及濟寧民皆被害

國朝

洪武元年河決曹州從雙河口入魚臺大將軍  
徐達開塌場口入于泗以通運時戴村未壩

汶由坎河注海運阻故引河入塌場以濟之  
二十四年河決原武之黑陽山東經開封城北  
五里又南行至項城經潁州潁上東至壽州  
正陽鎮全入于淮而故道遂淤

永樂九年以濟寧州同知潘叔正言命尚書宋  
禮役丁夫一十六萬五千濬會通河乃開新  
河自汶上縣袁家口左徙二十里至壽張之  
沙灣接舊河九閱月而成績侍郎金純從卞  
城金龍口下達塌場口築隄導河經二洪南

入淮漕事定爲罷海運至今賴之

正統十三年河決滎陽衝張秋尚書石璞侍郎  
王永和都御史王文相相繼督夫十餘萬塞  
之弗績

天順六年河溢決開封府北門滄毀官民軍舍  
弘治二年河決原武支流爲三一決封丘金龍  
口漫祥符下曹濮衝張秋長堤一出中牟下  
尉氏一泛濫儀封考城歸德入于宿以布政  
使徐恪言命侍郎白昂役丁夫二十五萬塞

之

五年復決金龍口潰黃陵岡再犯張秋侍郎  
陳政督夫九萬治之弗績六年乃命都御史  
劉大夏平江伯陳銑役丁夫十二萬有奇一  
濬孫家渡口開新河導水南行由中牟至潁  
川東入于淮一濬四府營淤河由陳留至歸  
德分爲二派一由宿遷小河口入淮一由亳  
州渦河入淮分土命工始塞張秋二年告成  
自是河南歲計河夫矣

卷五

三

二百五十五

正德四年九月河決曹縣楊家口奔流曹單二  
縣達古蹟王子河直抵豐沛舟楫通行遂成  
大河

五年二月起工修治至五月中雨漲掃臺衝  
蕩不克完合

八年七月河決曹縣以西娘娘廟口孫家口  
二處從曹縣城北東行而曹單居民被害益  
甚是年驟雨漲娘娘廟口以北五里焦家口  
衝決曹單以北城武以南居民田廬盡被漂

沒

嘉靖六年河決曹單城武楊家口梁靖口吳士  
舉莊衝鷄鳴臺

七年河決淤廟道口三十餘里河道都御史  
盛應期奏開趙皮寨白河一帶分殺水勢  
八年飛雲橋之水北徙魚臺谷亭舟行閘面  
九年河決塌場口衝谷亭水經三年不去  
十三年又淤廟道口都御史劉天和役夫一  
十四萬濬之

卷五

三

是年河決趙皮寨入淮本年忽自河南夏邑  
縣大丘回村等集衝數口轉向東北流經蕭  
縣出徐州小浮橋下濟二洪趙皮寨尋亦塞  
十九年河決野鷄岡由渦河經亳州入淮二  
洪大涸兵部侍郎王以旂開李景高支河一  
道引水出徐濟洪役丁夫七萬有奇八月而  
成尋淤

十六年決曹縣衝谷亭運河不淤

三十二年決房村約淤三十里都御史曾鈞

役丁夫五萬六千有奇濬之

三十七年新集淤七月忽向東北衝成大河  
一而新集河由曹縣循夏邑丁家道司家道出  
蕭縣薊門由小浮橋入洪七月淤凡二百五  
十餘里趨東北段家口析為六股曰大溜溝  
小溜溝秦溝濁河胭脂溝飛雲橋俱由運河  
至徐洪又分一股由碭山堅城集下郭貫樓  
又析五小股為龍溝毋河梁樓溝楊氏溝胡  
店溝亦由小浮橋會徐洪河分為十一流遂

淤然分多則勢弱勢弱則併淤之機也

四十四年七月河果大淤全河南遶沛縣戚  
山入秦溝北遶豐縣華山漫入秦溝接大小  
溜溝泛濫入運河至胡陵城口漫散湖坡從  
沙河至二洪八月工部尚書朱衡乃請開都  
御史盛應期原議新河自南陽至留城僉都  
御史臣潘季馴請接濬留城舊河併力挑濬  
八閱月而成

隆慶四年七月黃河決睢寧縣曲頭集王家口

馬家淺等處運道沙墊一百餘里俱為平陸  
淤重儲船九百餘隻臣季馴築塞諸決河水  
仍歸正道儲船盡出

隆慶年間高家堰大潰淮水東趨決黃浦入淺  
而興鹽高寶諸邑匯為巨浸淮城水困民不  
聊生黃河亦決崔鎮等處而桃清河塞運道  
梗阻者數年萬曆六年臣季馴拜

命總督河漕築高家堰六十餘里歸仁集隄四十餘  
里柳浦灣隄東三十餘里西四十餘里塞崔

卷五

廿五

鎮等決一百三十餘處徐睢邳宿桃清兩岸  
築遙隄共長五萬六千四百三十餘丈馬廠  
坡隄七百四十餘丈使兩河不得外決築礮  
山大壩豐縣邵家大壩各一道約水不得北  
徙築徐沛豐礮縷隄一百四十餘里砌八淺  
寶應湖石隄共長一千五百七十餘丈建崔  
鎮徐昇等四減水壩修復淮安新舊閘  
遷通濟閘于淮安甘羅城南以納淮水故道

盡復

興亞院業北運總部